



CH-7144 Vella, 09/10/2015

Novitads dalla suprastanza communal

Leschas communalas

La lescha communal d'ustria e la lescha communal da sepultura vegnan presentadas alla populaziun el meins da november a caschun d'ina occurrenza d'informaziun. Tier la radunonza communal dil december dueien las leschas vegnir deliberadas per la votaziun all'urna dils 28 da fevrer 2016.

Loghens da scola primara e scoletta

En consequenza dalla digren da scolars primars vegnan las cundiziuns stipuladas el contract da fusiun per in menaschi da scola Vrin/Lumbrein buca pli ademplidas cun igl onn da scola 2016/17 ed ils onns suandonts. Quei ha per consequenza che la scola a Lumbrein vegn serrada cun la fin digl onn da scola 2015/2016. La scoletta a Lumbrein perencunter vegn puspei aviarta sin igl onn da scola 2016/17, cun quei che las cundiziuns fixadas el contract da fusiun vegnan ademplidas per ils proxims onns.

Elecziun menadra canorta da giuvenils Lumnezia

Gioni Colucello, che ha menau la canorta da giuvenils Lumnezia, ha abdicau sia piazza sin l'entschatta december 2015. La suprastanza communal ha elegiu Kerstin Sabrina Muff da Castrisch sco sia successura. Il pensum da lavur munta a rodund 10% d'ina piazza cumpleina durant il temps da scola.

Rendaquen casa communal Palius

Il project dalla casa communal Palius a Vella ei terminaus. Il rendaquen vegn presentaus a caschun d'ina proxima radunonza communal.

Sustegn finanziel ad instituziuns

- L'uniun „Natur und Kultur Surselva“ vegn sustenida cun CHF 2'000 per il project „Blicke in Raum und Zeit – Eine kulturhistorische Zeitreise in die Surselva“. Cul project vegnan la savida historica ed aschia ils beins culturals dil mistregn puril, la cultivaziun, cultura e natira documentai. En in emprem pass vegn fatg intervestas cun perdetgas dils onns 1930 e 1940 els vitgs da Val, Sumvitg e Vrin.
- La Chasa Editura Rumantscha vegn sustenida cun CHF 2'000 per l'ediziun dil cudisch „Emalio“ ch'ei vegnius screts dallas scolaras Flurina Albin da Lumbrein e Stina Hendry da Vella.

Project Ovras Zervreila

La dertgira administrativa dil cantun Grischun ha visau giu il recuors dallas organisaziuns digl ambient enviars la concessiun dalla Regenza Grischuna davart il project dallas Ovras Zervreila per la transmissiun dallas auas dalla Lumnezia a Zervreila.

Vischnaunca da padrinadi

Ina delegaziun dalla vischnaunca da padrinadi Sissach ha fatg viseta alla vischnaunca Lumnezia ed al vischinadi da Cumbel.

Posta Vrin

La filiala da posta a Vrin vegn serrada el decuors dil 2015. Egl avegnir vegn il survetsch da posta purschius entras in'agentura da posta che vegn integrada en la stizun dil vitg.

Plaz da glatsch Vella

Sil plaz da tennis a Vella vegn in plaz da glatsch artificial installaus sur la stagiun d'unviern 2015/2016. La suprastanza communal ha serrau giu ina cunvegnientscha corrispundenta per la purschida che stat a disposiziun naven dils 18 da december 2015 entochen ils 6 da mars 2016.

Mesiraziun traffic Vella

Per retscherchar la situaziun per augmentar la segirtad dils pedunzs sin la via cantunala tras Vella ei in indrez da mesirar il tempo vegnius installaus. Il radar vegn postaus durant ina fasa limitada en differents loghens per liung dalla via cantunala tras Vella.

Via Surcasti

Las lavurs da sanaziun dalla via da meglieraziun nr. 4 a Surcasti ein terminadas e la via ei vegnida collaudada.

Deponias per rimnar rumien verd

A Vella/Siglinas e Lumbrein/Crappera ein caums da lenn per rimnar curdems verds e lenna manecla vegni postai. Ils caums stattan a dispisiziun per deponer restonzas ord igl iert, decoraziuns da fluras, tagls da pastget, tagls da pumera eav. Lenna veglia astga buca vegnir deponida els caums.

Molocs a Lumbrein

La capaciad dils molocs tschentai per rimnar rumien a Lumbrein ei buca sufficienta. Perquei vegnan dus ulteriurs molocs tschentai a S. Roc; in per sacs da rumien ed in per veider.